

Generoso Heroi, antiqua Nobilitate & Virtute claro,

LEVINO à BVLOVV, Domino in Cziebul, Critzovv
& Radim: Consiliario Ducali & Regio primario &c.

EN tibi Leuine Buloui Heros Inchyte, Naturæ latentis inquisitionem nostram, Virtutis Tuæ meiq; in te amcris & venerationis ergo: dum tot annorum iuuentutis nostræ studiorum & animorum coniunctionem persuauem & intimam, contubernium assiduum, hisq; consimilia mecum recolligo. Quam necessitudinem tute à patria nostra iunior absens, ex Academiis aliis literis tuis sane elegantibus, & tunc temporis, & nuper Regiomonte tantum affectu ut apparet pristino & candido ad me datis, redintegrasti. Quod Grauitatis magnificæ & Splendoris Tui inter Reges & Magnates eximij moderamen insigne ego quidem (uti par est) animo grato agnosco & obseruo: utq; hanc quam Tibi offero Rerum Harmoniam æquo suscipias & diiudices omine etiam atq; etiam obsecro. Neq; mireris quod Paradoxa proferam, cum Veritas ipsa & Rerum Natura non ferant aliter. Quæ Rebus stipata Natura etsi ubiq; nos circumdet, nilq; nisi seipsam nobis seu sibiipsi offerat, quam tamen omnino hucusq; incomprehensa iaceat, res ipsa nullibi non obuia loquitur. Res in Mundo contemplamur, Aerem, Stellis, Terram, Aquam, Lapides, Metalla, Plantas, Animalia &c. in quibus existentia ipsa, structura, motus: quæ talia sunt, fiunt, excrescunt, mutantur, pereunt quotidie. Hominem, canem, vermem, plantam, lapidem &c. ex rebus iisdem generari, augeri, rursusq; interire seu in alia mutari experimur. Lignum, carta oleum &c. flamma concepta vel subito in aerem transeunt. Corpora grauiora ad terram tanta vi tendunt vix ut contineri queant. Colorum species à rebus profuere cernimus: Lucem perspicimus: sin minus, nigredine obducta omnia. Sonum per aerem & corpora quæuis transmitti audimus. Res alias alio modo percipimus. Viuimus. Mouemur. Ratiocinamur &c. Et similes rerum experimur myriades. Vbi si Causas & Naturam quæris, quasi logicans non tacendi rationem animaduertis. Ut interim rariora æque tamen experimentis vera præteream, quæ partim magica nuncupantur, partim alijs donantur titulis. Sed institutum præsens & pagina ipsa finem exposcunt: de doctrinis insignibus cum vere theoricis tum ex theoria practicis, ad priuatum & publicum passim directis commodum, alias tecum si visum tibi fuerit acturus. Sic Buloui magnifice te tuaq; Diuino (quod est omnia) submitto Numini. Anno 1586. Iunij 20. Rostochij.

Generos: Nobilit: Tuam
ex animo colens

MAGNVS PEGELIVS.